



Broj: 01,02,03,03/11-05-1-985/17
Sarajevo, 17.5.2017.

PRIMLJENO: 24.07.10 D			
Organizaciona jedinica	Klasifikaciona oznaka	Radni broj	Broj priloga

KOLEGIJIMA OBA DOMA PARLAMENTARNE SKUPŠTINE BIH
ČLANOVIMA DELEGACIJE PSBiH U PARLAMENTARNOJ SKUPŠTINI UNIJE
ZA MEDITERAN
KOMISIJI ZA VANJSKE POSLOVE PREDSTAVNIČKOG DOMA
KOMISIJI ZA VANJSKU I TRGOVINSKU POLITIKU, CARINE, SAOBRAĆAJ I
KOMUNIKACIJE DOMA NARODA
KOLEGIJU SEKRETARIJATA

IZVJEŠTAJ S 13. PLENARNOG ZASJEDANJA PARLAMENTARNE SKUPŠTINE
UNIJE ZA MEDITERAN (PSUzM)
Rim, 12. i 13.5.2017.

U Rimu je 12. i 13.5.2017. održano 13. plenarno zasjedanje Parlamentarne skupštine Unije za Mediteran (PSUzM), kojim su predsjedavali predsjednica Predstavničkog doma Italije **Laura Boldrini** i predsjednik Senata Italije **Pietro Grasso**. Na zasjedanju je učestvovala Delegacija Parlamentarne skupštine BiH u kojoj su bili: **Hazim Rančić**, predsjedavajući Delegacije, i **Diana Zelenika**, zamjenica predsjedavajućeg, zatim predstavnici Evropskog parlamenta, te nacionalnih parlamenata oko 30 zemalja članica PSUzM.

Plenarnom zasjedanju PSUzM prethodio je sastanak Komiteta za poboljšanje kvaliteta života, razmjenu iskustava između civilnih društava i kulturu Parlamentarne skupštine Unije za Mediteran, kojim je predsjedavao **Khalid Chaouki**, zamjenik predsjednika Komiteta. Chaouki je upoznao prisutne s dnevnim redom i zapisnikom s prethodnog sastanka Komiteta, održanog u Rimu, 3.4.2017., koji su zatim usvojeni. Predstavio je Nacrt preporuke „Suzbijanje radikalizma i podsticanje međureligijskog dijaloga i ekonomskog razvoja kao instrumenata novog euromediterranskog paketa“, sačinjene prema zaključcima s prethodnog sastanka Komiteta 3.4.2017. Na sastanku je razmatrano 27 prijedloga amandmana koji su uloženi na Nacrt preporuke.

Plenarno zasjedanje bilo je posvećeno temi: „Održivi razvoj i nove mogućnosti za zapošljavanje u mediteranskom području: Zapošljavanje u zemljama Mediterana i Program održivog razvoja do 2030. godine“. Usvojen je dnevni red i zapisnik 12. plenarnog zasjedanja PSUzM-a, održanog u Tangieru (Maroko), 28. i 29.5.2016.

Boldrini je istakla da se na Mediteranu, nažalost, i dalje nastavljaju problemi migranata, koji su izloženi trgovini ljudima i prostituciji, posebno žene i djeca, kao i problem terorizma. Smatra da mladi ljudi neće pristupati terorističkim grupama, ako im se obezbijedi posao i

bolja budućnost. Veoma je važno da parlamentarci rade na zaštiti ljudskih prava, jer se bez toga ne može govoriti o demokratiji.

Grasso je naglasio da Italija poseban značaj daje problemima migracionih tokova, terorizma, nezaposlenosti. Parlamentarci su oni koji donose odluke i potrebno je da odgovore građanima i budu brži u donošenju zakona koji vode rješenju problema i osiguravanju bolje budućnosti građana.

Prisutnima se obratila **Federica Mogherini**, visoka predstavnica Evropske unije za vanjsku politiku i politiku sigurnosti i kopredsjedavajuća Unije za Mediteran. Smatra da građani zemalja obje strane Mediterana imaju utisak da su nesigurni u svojim zemljama i da politički sistem ne funkcioniše za njih. Mladi ljudi nemaju posla; žene nemaju mogućnosti koje zaslužuju; građani imaju osjećaj da nemaju istu ulogu, da nemaju pravo govora; mnogi gube povjerenje ne samo u političke institucije, nego u sve institucije koje predstavljaju društvo. Frustracije građana rastu i vrlo lako se mogu pretvoriti u očaj, a očaj u ljutnju. Na Balkanu, srednjem Istoku, sjevernoj Africi mnoga obećanja o promjenama na bolje se ne ostvaruju. Mnogi mladi preduzetnici suočavaju se sa svim vrstama barijera: birokratskim, socijalnim, finansijskim. Smatra da je ono što građani mediteranskih zemalja trebaju i na čemu je potrebno zajednički raditi pružanje mogućnosti pristupa građanima, njihovo uključivanje i borba protiv nejednakosti. Istakla je veoma značajnom zajedničku saradnju zemalja članica Parlamentarne skupštine Unije za Mediteran i Sekretarijata Unije za Mediteran, koji će i dalje nastaviti da investiraju u zajedničku saradnju. Istakla je da je potrebno razmotriti 50 regionalnih projekata UzM-a, koji vrijede preko 5 milijardi eura, a koji su posvećeni za tri oblasti za koje Mogherini smatra da su najznačajnije na kojima je potrebno raditi, a to su: 1. prvenstveno mladi ljudi, kojima je potrebno maksimalno obezbijediti stvaranje radnih mjesta; mogućnosti uključivanja u ekonomiju, društvo, političko kreiranje. Omogućiti im da uđu u politički sistem, promijene ga, usavrše, od čega bi cijelo društvo imalo koristi; 2. osnaživanje žena; potrebno im je omogućiti da budu aktivni članovi društva, politike; također osigurati zaposlenje, posebno samohranim majkama; 3. formalizacija neformalne ekonomije; omogućiti bolju zaštitu i garanciju neformalnoj ekonomiji, legalizirati ekonomski sistem.

Enrico Giovannini, redovni profesor ekonomske statistike na Univerzitetu Tor Vergata u Rimu i portparol italijanskog Saveza za održivi razvoj (ASviS), skrenuo je pažnju na globalne probleme s kojima se svijet suočava, te značaj Programa održivog razvoja do 2030. godine koji su usvojile zemlje članice Ujedinjenih naroda na Samitu o održivom razvoju 2015. godine. Program sadrži 17 ciljeva održivog razvoja, koji imaju za cilj iskorjenjivanje siromaštva, neravnopravnosti i nepravde, te rješavanje problema klimatskih promjena do 2030. godine. Giovannini je naveo da Program ne može biti proveden i da se ciljevi održivog razvoja ne mogu postići bez velikog uključivanja privatnog sektora i civilnog društva, te naveo neke prijedloge upućene parlamentima i vladama: uključivanje privatnog sektora i civilnog društva; uzimanje u obzir 17 ciljeva održivog razvoja prilikom zakonskih prijedloga; savjetovao da provjere da li u ustavima njihovih država postoji koncept održivog razvoja; izmjena programa obrazovanja, u koji bi bilo uvršteno učenje o 17 ciljeva održivog razvoja.

Fathallah Sijilmassi, generalni sekretar Unije za Mediteran, smatra najvažnijim prioritetom jačanje regionalne saradnje, te je naveo da se u Mapi puta za jačanje regionalne saradnje, usvojene u januaru na Regionalnom forumu Unije za Mediteran, ističe da „nema razvoja bez sigurnosti i da nema sigurnosti bez razvoja“. Najbolji način u suzbijanju uzroka mnogih problema s kojima se suočava region Mediterana, kao što su migracije, ekstremizam i terorizam, kao i najbolji način da se promovira efikasna stabilnost, društveni i ekonomski

razvoj. jeste fokusiranje na promoviranje ljudskog razvoja, jačanje regionalne integracije i podržavanje održivog razvoja u Mediteranu.

Boldrini je istakla da je 12. maja Delegacija Kraljevine Maroka izabrala Mohamada Ihouiyet-a za novog predsjednika Komiteta za poboljšanje kvaliteta života, razmjenu iskustava između civilnih društava i kulturu PSUzM-a.

Parlamentarna skupština Unije za Mediteran usvojila je Preporuke Komiteta za politička pitanja, sigurnost i ljudska prava, Komiteta za ekonomska i finansijska pitanja, socijalna pitanja i obrazovanje, Komiteta za poboljšanje kvaliteta života, razmjenu iskustava između civilnih društava i kulturu, Komiteta za prava žena u euromediterskim zemljama i Komiteta za energiju, zaštitu životne sredine i vode.

Boldrini je predala predsjedavanje Parlamentarnom skupštinom Unije za Mediteran Parlamentu Arapske Republike Egipat, koji će predsjedavati narednih godinu dana.

Pripremila¹:

Lara Borovina,
sekretar Delegacije PSBiH u PSUzM-u

Lara B.

Dostaviti:

- naslovu
- Ministarstvu vanjskih poslova BiH
- a/a

¹ Uz saglasnost predsjedavajućeg Delegacije PSBiH u PSUzM